

復  
初  
齋  
文  
集

復初齋文集卷第十三

大興翁方綱撰

門人候官李彥章校刊

金壇蔣氏三世合傳

予少時卽聞金壇蔣拙存老人寫十三經之名滿天下  
既而督河高公以墨本上之 乙覽授以國子學正於  
是天下學者益知稽古之榮今所見傳神祕要一書卽  
老人季子勉齋驥所撰也今年春識勉齋子和出其三  
世志狀等而勉齋於父學獨能發明八法之旨因書及  
畫又及姓氏梵音諸篇信乎其克家矣其於姓氏謂凌  
氏萬姓統譜有複有漏因別條次之曰姓本曰封國曰  
氏別曰姓氏合併曰代北姓曰遼金元姓曰改氏曰無

徵凡百八十卷又撰讀史偶記九宮圖釋梵音釋略各一卷於畫著畫學記聞一卷蓋勉齋三歲失怙既泣求母容弗得則學寫像法盡得其祕乃徧問家人追摹母容以爲神於書尤精分隸著漢隸譌體一卷集古帖字體一卷續書法論一卷其言曰漢魏字體不同性情各異又曰書須懸臂中鋒而用力以和平爲主又曰作山水人物當如作書用筆之提頓逆折章法之參差映帶其理一爾勉齋之闡其家學如此拙老人可謂有子矣然老人平生著述首在顯親其敘先人略曰諱進字度臣號退菴父鳴玉崇禎丁丑進士官兵科給事中兄超順治丁亥第三人及第王漁洋所稱前世峨嵋山老僧

丞稽古之榮也先生爲人敦本行篤於友愛在京師捐俸葺山西三忠祠三晉會館義園并宣武門外楊忠愍公故宅又於永定門外舉掩骼之會偕同志春秋集訂規條以垂久遠其好義多此類也先生爲學以養性爲功精導養之術蚤歲歷遊東南山水居京師每以暇日尋勝西山戒壇香界諸寺晚益專功靜攝儼道院以課孫有詩集若干卷體格在香山放翁間嘗手自核定河汾諸老詩集刻之自古詩人在中條王官谷若李義山司空表聖元裕之及近日吳蓮洋皆以才力跨越前後而先生獨以性情冲澹與道大適脫然於名譽之外此則三十年同館相知中先生獨許方綱爲能窺見一二

者故述其略爲之傳

丁小正傳

丁杰字陞衢號小山又號小正浙江歸安人乾隆辛卯舉人辛丑進士官宣波府學教授嘉慶十二年二月卒年七十子授經傳經皆能世其家學傳經述其狀略俾予爲之傳君爲人純孝誠篤於滇南迎父柩以歸葬於宣郡捐貲監脩 聖廟尤其足記者而以方綱知君則北學齋晨夕商訂之益爲多也予爲君題北學齋扁在京師宣南坊金氏家與予對門而居乾隆戊戌己亥數年間無日不相過從共几展卷審正罅漏如對古人嘗相約補正秀水朱氏經義攷序尾年月竹垞此書綱領

閱富有資援據顧所載序跋多刪去末行年月此鈔盾  
意在省便致使作者先後次序無所按據予時在四庫  
館日鈔數條歸以語君君亦博採見聞以相證合惜其  
後未能竟功竹垞所見之書今或有未見者而其每書  
下載某人曰不明著出於某卷尤失攷訂之宜君亦慨  
然與予同志補正之今予所刻補正卷內雖闕有述君  
語者特其字句小異處尙未足盡發君之篤志也丙午  
秋予視學江西不相見者二年餘矣至己酉九月予自  
南昌役竣將登舟而君適來相訪是日送行者皆出惟  
新城魯生嗣光在側猶及與君相質鄭義數事巡撫何  
公裕城已待於河干子臨別謂何公曰吾此行極戀戀

者惟一研經老友丁君適來在此公幸以講席延之於是君應聘主吉安鷺洲書院而此後訖未得見矣予在館中披讐數年所時資取益者盧抱經精校讐王石曜桂未谷精訓詁而君兼有之每竟一編校籤細字壓粘倍其原書皆目光髯影栩栩飛動處所定鄭氏易大戴禮記尙書大傳皆將次第刊布至如因鄭正睦寔志而摹毛西河朱竹垞二先生像因王次然周禮訂義校本而摹方望溪鍾勵假二先生像其心目刻刻與古人爲徒精神所至穿透萬卷一時學人實罕有其匹非子弱筆所能摹繪者矣

黃秋盦傳

君姓黃氏諱易字大易錢塘人明參議貞父先生七世孫父樹穀以篆隸名家世稱松石先生者也故君自號小松其先世居馬啞卽姜白石詩每聽秋聲憶故鄉地也有秋影庵故君又自號秋盦君幼承家學精究河防事宜初佐治州境輒有能聲旣而出仕東河歷縣倅分刺東平擢蘭儀同知前後兩任兗州府運河同知兩護運河兵備道事其才足以大受而志未竟是可哀也君官河壩二十年凡堤埵大工開口蓄洩每伏汛秋汛晝夜殫力捍禦兌漕釐運諸務籌畫備至丁未之冬浙江糧艘十餘幫阻凍於七級閘舵下水手乏食君力請借帑活萬餘人其他督率工員相機剔弊皆此類也君爲



人誠信重然諾伯兄以事遣戍君措貨爲贖罪兄喪數  
千里遣幹僕扶柩歸葬於杭及爲幼弟爲兄子女營婚  
嫁以逮族黨推誼肫摯咸視此君精於金石六書之學  
自歐陽趙洪所未見者皆著於錄嘗手自鈎摹漢魏諸  
碑附以題跋開雕成帙曰小蓬萊閣金石文字又有小  
蓬萊閣碑目小蓬萊閣者其先貞父先生讀書南屏書  
室名也丁酉秋君於都下得漢熹平石經般庚論語三  
段時方網亦摹此勒石援洪文惠鐫石經於會稽蓬萊  
閣故事以名齋旣乃知君家先有此名洵一異也君在  
濟寧升起鄭季宣全碑於曲阜得熹平二年殘碑於嘉  
祥之紫雲山得武斑碑武梁祠堂石室畫像適揚州汪

氏所藏古揚武梁像冊歸君齋此冊自竹垞衍齋查田諸老輩往復鑒賞幾疑世久無此石矣一旦君乃兼得之於是敬移孔子見老子像一石於濟寧州學而萃其諸石卽其地築室砌石榜曰武氏祠堂立石以記之君北抵燕趙南遊嵩洛又四方嗜古之士所得奇文古刻無不就正於君以是所蓄金石甲於一時皆不及縷數而述其一二大者於此君每得一舊蹟眸色炯溢顧頰間又多蓄漢印諸吉金雜器物款識摩挲終日不去手畫雖兼效倪黃而實自成一格蒼秀出意表又精於摹印談笑之頃鐵穎剝然立成數枚出懷袖以贈友馳論千古看軒尋丈外嗟乎黃伯思米芾而後世久無此人

矣濟宦李東琪字鐵橋亦以金石之學世其家與君最契適有鐵松觀碑圖卷方綱題甫就而君訃音至矣嗚呼傷哉今日石墨論交惟予知君最深者故不辭而爲之傳鐫諸石者安邑宋葆淳也嘉慶七年六月朔

金愚巖小傳

昔吾先君子獲交於吾邑金太史元音前輩時方綱初應童子試輒聞金氏家世甚悉及通籍後聞吾友盧弓甫縷縷說愚巖公學行政績蓋太史之猶子而藩伯公之子也其後二十餘年公與子居同巷益得日聆緒言則丁小兀進士日來予齋所備述也以方綱之疎懶善忘又未獲件繫著於錄而今僅就公嗣君所爲狀者粗

述於此公諱克城字孚中一字恆甫先世由江寧遷居  
京師曾祖國勳以祖懷璉公貴贈榮祿大夫父溶陝西  
布政使公學有本原所蒞有政聲宰江西之新昌萬載  
廣昌宜黃瑞金而於瑞金尤著又宰甘肅之碾伯安定  
罷歸里居又十有二年而卒公每蒞一邑計月立簿爲  
交代總冊曰吾時以自省且不使人欺也又所至之境  
必寫四至八到山川地圖於屏凡地勢險阻與利弊所  
繫無不日往復於懷也在碾伯湟水高店堡舊有二渠  
引湟灌之廢三十餘年矣公捐俸脩復有長至三十里者  
又按脩臯蘭紅柳溝渠民得長享其利其在瑞金縣西  
南桃陽隘庵子前爲章貢上游路通閩粵舊有石橋圯

壞七年矣公捐俸葺之今名金鵲者也凡脩葺坡塘四十有六橋梁四十有四初至瑞金手釐積年訟牒六百三十餘案嘗訪王文成編鄉約法立約長約副約史約贊定彰善糾惡之牘邑有貢生張永堯永亮兄弟訟產公視之二人鬚髮皆白矣然氣洵洵面青白色公徐徐與說後漢樊氏宏父重三世共財唐張公藝九世同居等事二人者氣色漸就和又呼使近案前曰予家大父當分居時一切財產俱讓不受僅取戶額數字耳後它房漸衰替而吾大父享年八十有四子六人登科者五成進士者三世間難得者兄弟耳爾二人年皆垂老知相聚尙有幾日忍復相搆耶二人噫嗚流涕相抱持痛

哭而去又條復錦江書院增膏火以朱子白鹿洞規條  
及桑叟甫大梁講院課規爲士人式蓋桑徵君調元公  
所帥事嘗與盧弓甫語同爲勞餘山再傳弟子者是也  
弓甫小山二公皆與君最相善二君皆時來予齋稱君  
篤志諸經議論有根柢惜予未能盡記憶也其最有益  
者謂易八卦方位明著於說卦傳不可移易宋儒未達  
乾西北坤西南之首乃以先天圖爲伏羲所定方位易  
注之最古者無若李鼎祚集解所列三十餘家皆未言  
及此漢隋唐志亦無易圖之目朱子謂其出自陳希夷  
宋史藝文志希夷性傳龍圖一篇此所謂先天方位圖  
者卽以之屬希夷尙無確据而况可躡加於文王孔子

之上乎公此論大意與胡東樵易圖明辨相埒學者所宜各書一通於周易卷前者近見嘉定錢辛楣行狀內亦有此論蓋辛楣與弓甫小山皆邇日經師之足傳信者而愚巖金公一生殫力民事其貫穿經訓又如此今日知公者惟小疋在也公之第二子紹綸屬爲公作傳踰歲矣恨予筆弱不足以張之當寄語小疋共爲詳立家傳耳

吉水趙氏五節婦傳

吉水城北趙氏一門五節婦爾基妻曾氏基從兄弟爾圭妻蕭氏爾堅妻曾氏爾堂妻郭氏圭同母弟爾臺妻龍氏也爾基有能文聲然試輒不遇抑鬱死曾氏守志

四十餘年無子其女弟爾堅妻有子既授室矣子婦皆  
早卒曾氏守節三十有五年蕭氏生子發銘五月而爾  
圭卒守志三十有一年發銘邑庠生爾堂妻郭氏亦無  
子年十八歸堂越六年堂卒與諸妯事姑尤謹哭夫與  
姑至失明郭氏守志三十年而與蕭氏兩曾氏同被  
盲於其間爾臺妻龍氏方待旌云趙氏家傳云先是吉  
水城東解氏者一門五節婦故時人爲之語曰趙若解  
婦之楷

論曰明桐城鍾氏一門四節婦時人稱之曰四節里今  
吉水趙氏以五節稱於古罕臻焉故爲斯傳無溢辭以  
俟史氏



洪節母傳

乾隆己亥夏予得識武進洪君禮吉發其篋得所爲詩文若干首皆磊磊志節之言又刊史傳謬誤若干卷洪君蓋欲予知其學行所自也泣而言曰公可以爲某母氏之文矣君甫壯歲遊京師而衣飾樸素無華曰吾母教之以安志而平心也君客於外數年矣非義之財視若醜毒曰吾母教之以禮致養也君所與交皆文人正士有延君授讀者母聞其服官狀戒毋往其時相過從者必審察其學行曰擇友最難當慎於始也君爲學無所不窺而訓故尤精蓋母幼肄詩爾疋漢魏樂府辭急就章辨正古今字音義父嶠峨令嘗命手書諸經授弟

妹及洪君從母受諸經難字分日手課之君猶記讀至禮經夫者婦之天句母慟絕良久呼曰吾何戴矣遂廢是句讀也君生六歲而孤母夜績授經淘麥屑及糠覈以食而日儲米數合食其子子不食泣母亦泣洪氏世有隱德然母居貧不肯貸於人曰惡其近於取償也每訓子輒陳說先世遺澤及居官善政聞於君父監生君者爲子制衣尺寸必使如其大父及父時曰母隨俗遷改又曰汝父生平砥品礪行吾望汝爲完人非求貴顯也嘗積紡績及子授讀所入舉三世七棺遇諸妣暨撫諸從子尤厚娣婦余蚤寡以次子迪吉後之通州人盛聰者其弟覆舟於江君父監生君出之監生君在殯比

戶失火聰冒死翼棺而聰貧一子年幾四十未娶母鬻錢裝助之其以內行爲教皆此類嗚呼節母之孝慈者世固有之至於服飾取子之際關係士人之品概世教之廉隅者求諸壺訓不其難歟若夫函雅故正文字尤婦人所難而在母則尤其小者故洪君以副榜貢生克有聞於時蓋不徒以其文矣監生君諱翹其卒也母年三十八母姓蔣氏卒年六十三洪君以母命客處州聞母病遽歸已後舍歛十八日矣故其求所以傳母者哀切尤異於人嗚呼吾文何足以傳之

次兒樹培小傳

次男樹培以末疾病廢歲餘竟不起老人不忍爲之傳

也顧念兒入詞垣職部曹受 聖恩未效涓埃報贖志以沒又無子若不爲撮述大略恨且焉窮是以濡淚筆之兒生於乾隆甲申臘月十三日余方渡海試瓊州府其夕夢筆端若有光記之占者謂是文字祥也占者曰此兒壽命不長宜出繼異姓爲子或可免及北歸以語同年錢樺石樺石曰是宜爲吾子遂攜至錢家樺石名之曰申錫字曰申之幼學時往來錢氏家是時子以再入翰林預修四庫書日事校讐不暇爲舉業課計兒獨規所校說文嗜之雖案有他家墨帖皆所不願學惟篤好摹寫篆隸樺石曰此兒日日手作邈邈諸字我所不能知也其後習舉業而不嫻詞藻專力校勘於史家年月

歷朝年號後先同異如鍾廣漢建元考萬柘坡紀元韻  
敘諸編尤所詳核於洪顧諸家泉志更爲該悉予亦望  
其將來從此博涉攷訂之學庶幾有成而孰意竟止於  
此乾隆丙午舉順天鄉試丁未成進士改庶吉士肄

國書已酉四月授檢討充國史館會典館纂修官

然於詞賦非所長也嘉慶丁巳御試三等補刑部

主事辛酉壬戌會試充同考官己巳陞貴州司郎中總

辦秋審處行走俸滿引見蒙恩記名以繫缺知

府用感激恩遇日夜思所以展力圖報稱職者實

則無他長才惟有能細心校勘訛字自本章文移及司

藁案冊繼以夜歸篝燈詳看夜入直宿或備奏西苑

皆件系手抱每五鼓趨入則夜半卽起以此爲常而其  
受病在於不能夜起強飯始而懷蓄食物繼乃空腹從  
事又其後乃習飲酒又每於夜起不食而飲酒是以積  
毒始發於目漸不能治官書漸且毒發遍身醫者又多  
投以涼藥遂至中氣大虧卒以不救可哀也夫著有錢  
錄若干卷應鐫板以成其志於分隸最所究心去年秦  
敦夫於揚州鐫淳熙隸韻兒欣然有志校讐昨敦夫以  
拙著隸韻攷正二卷續刻於揚亦寄一本於兒俾附名  
其後而已無及矣

桂未谷所作說文統系圖贊

未谷作說文統系圖乞題於方綱旣糾吾子行所稱倉

韻十五篇之失以復於未谷未谷曰蓋卽以此跋之爰  
爲之贊贊曰

竹素聞師曰十五篇卽倉卽許子竊惑焉然其論諧聲  
爲韻書之所先若依其法則毛詩楚騷皆可了然以此  
承江徐之後其庶無愆然竹素又論嶧山碑攸字李處  
與本直筆相連而於許氏以爲从水何以不加言詮徐  
精許書而碑弗許沿卽此一字而滂喜急就上下相宣  
子是以冀古人之我告而日日焚香拜祝於此圖之前

撥鐙法贊

炷火以爲鐙撥鐙實撥火不聞發的時手或礙於筭不  
聞撇舟時手或牽於舵火燭爲之樞以指爲關鎖山谷

論亦云病右常豐左似欹實乃正爭上非偏頗或云逆筆是逆亦非由我所以東坡云守駿莫如跛

杜少陵戴笠像贊

飯顛之詩傳其戴笠太瘦之神萬古獨立其瘦似耶其笠似耶則吾何敢執

坡公笠屐像贊

此像繪於粵東時甫得嵩陽帖載一葦之煙篷後廿七年供於蘇齋之中乃得偃松屏贊與施顧集注共香篆而交玉虹浩乎襟袖大海長風

蘇文忠笠屐像贊

焉得好手散髮而騎鯨惟此金山之蹟龍眠所營蔡詩



公書宋槩公集天風海濤坐客起立寄之公像篆煙一  
縷一笠一屐橫萬萬古昔聞陳氏之蘇庵與蔣氏之蘇  
齋今我寶蘇名室眞見公來蔣有麓臺之畫陳則不知  
我但日誦漢書以配公書與詩

黃秋盦所供東坡笠屐像贊

黎鄉載酒之東坡卽玉堂制草之東坡秋影盦中之東  
坡卽詩境龕間之東坡嗚呼奎躔月午星斗森羅乞公  
墨瀋而不克肖也我勞如何

夢蘇草堂坡像贊

翩然乘風爲誰而來草堂月下人靜簾開公眸炯炯注  
視徘徊其有所指顧耶喜補注之寫懷王施顧查而後

誰許訂爲同儕是以題自寶蘇之室而供於踵息之齋

東坡居士像贊爲周載軒題

昔於湖口記石鍾山噌吰鏗鏘響激人寢後七百年有  
奉公像者焉嗚呼心耳之微口不能傳萬竅喁于卽此  
坐間

黃秋盦摹雪浪石盆銘贊

雪浪盆銘今毀夫坡公大楷吾誰質研池神光雪以帥  
庚庚刻畫盆口匹依然老守中山筆秋盦笑證寶蘇室  
七百年辰涵戊方綱續銘仲夏日

黃文節公像贊

乾隆乙未先生生日稽首奉像而公詩逸編適出今十

年後摹像重開敬題像贊而公集新本適來昔則在蘇齋耳況今在豫章乎公之視此齋也何以異於視分宜之草堂乎然則區區寸心苟有一毫愧於先生者將何以拜像而焚香乎

羅兩峰摹孫雪居畫米南宮像贊

楊之庵桂之巖友仁之贊雪居重拈兩峰夢中嘗與對談曰曾在蘇米齋中以供硯山而配子瞻

方正學先生像贊

摹公之書矣復摹公之圖摹書未肖也摹圖則應弗殊公之威儀文章或想像於操觚獨所不能摹者公之心乎所以合裝於公文者如日侍於坐隅審其精神覲其

起居在月映寒江之際星芒射斗之初

邊華泉尙書像贊

尙書峨峩峩着宇高寒久宦金陵袖有煙轡四傑初唐七  
子建安豈讓詞場何李登壇後有漁洋遺集重刊司徒  
司寇並峙鄉關至今逸韻猶在人間

文衡山像贊

嗚呼公之歸也兆於守溫植彼不芳而反茁其根消息  
之理莫知所存嗚呼名高師友今慶及子孫

邱東河所藏倪文正公柱石圖贊

嗚呼此甲戌之秋時勢何如其易言柱石乎吾直拈此  
以爲學易之功夫

朱竹垞煙雨歸耕圖贊

先生果言歸乎食力以療饑乎所犁鋤者三百卷之精  
微所刈穫者自序篇之發揮噫嘻知者希矣

吳蓮洋像贊

手一卷書據石而坐河水九曲鬱蓮一朵玉谿王官誰  
彼誰我漁洋蓮洋卽薪卽火天風海濤綠房丹鎖水流  
花開無平不可

黃秋盦四十九歲像贊

丁酉寫像初持石經小蓬萊閣覃溪共銘今十六年髯  
猶未星齋於沛上蓮河之廳何啻馬城秋影滿庭鐘鼎  
尊彝古光熒熒先生微笑語我試聆更多心得請啟祕

扁先生不言恐洩精靈但持此卷觀古墨馨仍與覃溪  
相對眼青

劍亭司成像贊

時而綠波花霧時而簔笠攫髻貌則西清東序神則山  
巔水涯所以寄三泖九峰之夢而結揚雄庾信之齋時  
亭就居魏冉衡衡之屋此屋前明吳梅邨居之國朝  
史貞司居之舊有前輩集聯云旁人錯比揚雄宅異代  
應教庾信居劍亭屬予重書

夢因居士小像贊

誰其居者乃夢之因集虛生白念念塵塵金石盟言松  
竹精神水與月乎孰是前身

瑞金楊節婦傳贊

嗟乎子讀其傳是不死其夫又讀其末章是不愧其始  
宜乎羅君乞題此而後出都嗟乎誰其傳者蔡尙書

復初齋文集卷第十四

大興翁方綱撰

門人候官李彥章校刊

皇清誥授朝議大夫前

日講起居注官翰林院侍讀

學士抱經先生盧公墓誌銘

公姓盧氏諱文昭字紹弓號磯漁又號檠齋晚更號弓  
父抱經其堂顏也人稱曰抱經先生其先自范陽遷越  
又自餘姚遷居於杭曾祖承芳建平令祖之翰父存心  
恩貢生應試宏詞科公以乾隆戊午中順天鄉試壬戌  
授內閣中書壬申一甲第三人進士編修丁丑會試同  
考官 尚書房行走戊寅署 日講起居注官陞左春  
坊左中允翰林院侍讀甲申陞翰林院侍讀學士乙酉



主廣東鄉試丙戌會試同考官視湖南學政戊子以條  
陳學政事降調還都旋假歸里至壬子猶賦重遊泮宮  
詩年七十九而卒公前後在中書十年在翰林十有七  
年又前後於鍾山紫陽書院及崇文龍城婁東暨陽晉  
陽疊主講席著錄稱極盛焉公精於技藝於陸氏經典  
釋文取宋本參校又別爲攷證附本書後又於逸周書  
孟子音義賈誼新書春秋繁露方言白虎通西京雜記  
蔡邕獨斷諸書皆彙諸家校本詳勘刊正又於友朋相  
質若荀子呂氏春秋釋名韓詩外傳顏氏家訓封氏聞  
見記謝宣城集皆手加是正又於五經正義表若周易  
禮記注疏若呂氏讀詩記若魏書宋史金史若新唐書

糾謬若列子申鑒新序新論諸本脫漏者咸加蒼翠曰  
羣書拾補并系以校語公精研許氏說文晚復雅意金  
石文字之學所著述古文集外有廣雅注釋訂正儀禮  
注疏史記索隱而鍾山龍城札記及其他題跋件繫攷  
證之書不可勝記卽以秀水朱氏經義攷公所補正手  
書草藁以寄方綱出於方綱所補正千餘條之外者此  
尙皆未刊行者也公爲人方嚴誠篤事親孝與人忠其  
殫竭心力爲人所難能者筆不勝書而方綱於其嗣君  
之請志墓專詳於所訂諸書者校讐經籍之功近世儒  
林之所少也公生於康熙丁酉六月三日卒於乾隆乙  
卯十一月二十八日娶桑氏繼娶謝氏楊氏子男四慶

詒附監生武謀監生慶鐘慶錄女四孫男一以嘉慶元年十二月葬於朱芳橋之原銘曰盧氏系出稽自范陽大小戴記解詁始詳淵矣先生後先相望緝之禮注功續議即整齊百家訓故三倉包羅羣粹擔撫衆長先生精靈汗竹有光須友之齋康成禮堂學海長瀾滙注於杭詒厥後人湖山澤長

皇清例授文林郎 賜同進士出身署福建將樂縣知

縣惺齋王君墓誌銘

君諱元啟字宋賢號惺齋先世自杭遷嘉興曾祖國泰祖承榮父昌業世有隱德君幼卽有志聖賢之學不爲時俗文字舉乾隆甲子浙江鄉試辛未成進士署福建

將樂縣知縣三月而罷然其釐訟獄禁博塞設十家牌  
平鹽價立排糶之法禁質庫重利疏濬溝渠脩築橋梁  
道路諸實政悉殫心力爲之邑人以為抵作令者數十  
年之功既以誣被吏議復至其邑民扶老攜幼饋芻米  
汲爨及鄰境之民皆歡迎如慈母君雖於經濟未竟其  
志而教人之用尤著前後歷掌講席於延平道南書院  
者再又於仙遊之金石邵武之樵川順昌之華陽蓋在  
福建最久也河南則衛輝之崇本山東則濟南之灤源  
嵩安曹州之重華於其鄉則鎮海之鯤池三十年間十  
主書院之任所成就之士以學行文藝著顯者數千百  
人君爲學以宋五子爲宗說經尤精於易而爲文一本

韓子撰讀韓記疑十卷周易四書講義韓非子史記漢書孫可之歐曾王文集及錢文子補漢兵志諸書校正評注凡若干卷惺齋論文勾股九章總論祇平居士文集恭壽堂庭訓若干卷凡嗜學多聞之士知攷訂者輒多厭薄宋儒以自憙今日學者之通患也君博極羣書勤攷證工文詞而篤守程朱之旨終身勿貳誨人勿懈可謂真儒也矣既病革猶補注周易下經及校勘韓集易至既濟止韓集則易簣前一日命子尙繩改定順宗實錄記疑條中二字蓋其貫天人古今之精力畢生以之先生生於康熙五十三年七月十一日卒於乾隆五十一年七月一日年七十有三娶沈氏例封孺人男三

天石早卒尙珏附監生四庫全書謄錄廣西候補縣丞  
尙繩增廣生孫男二克任國子生克新孫女一曾孫男  
一銘曰孰能博綜漢唐而確執程朱淵哉若人不見是  
圖學則伯厚東發教則鹿洞蘇湖蓋超出於籍湜紹述  
間而獨爲韓之徒

皇清誥授奉政大夫翰林院編修加四級戴圍程先生

墓誌銘

昔方望溪爲李剛立志墓於習齋崑繩諸人自別於程  
朱之非痛切言之虞道園所爲慨然於魯國許公以表  
章程朱爲已任也新安程編修戴圍少以文名江南乾  
隆壬午始官京師予與接席賦詩目爲淹雅者流耳後

十年予自粵東歸始與深交往復劇切者十有二年嘗歎其博綜經史詩文撰述皆所易幾而獨其篤守程朱爲後學所宜矜式也君束髮時讀戴山劉念臺人譜見其論守身事親大節輒心慕之故以戴園自號其後綜覈百家出入貫串於漢宋諸儒之說未始不以程朱爲職志也著正學論七篇反覆於體用博約之際嘗與友人書謂宋儒講太極河洛牽入麻衣希夷之說又以鄭衛爲淫詩其他小誤處間亦有之大者止如是至於天道人紀節心制行務爲有用之學百世師之可也古人一飲一食必祭先嗇先農是不忘本吾儕被服儒素亦思其源安在而敢自異乎君治經之功與年俱進著周

易知止編三十餘卷尙書今文釋義四十卷尙書古文  
解略六卷詩毛鄭異同考十卷春秋左傳翼疏三十二  
卷禮記集釋若干卷諸經答問十二卷羣書題跋六卷  
又所爲詩文凡若干卷桂宦書目若干卷桂宦者君讀  
書室名君家素饒於財自少至壯積書三萬餘卷中年  
已後家落而書亦稍散失矣君先世系出周大司馬伯  
休父封於程以國爲氏西晉末以宦遷新安君之高祖  
自歛遷揚以鹽筴起家君早失怙恃中遭逋負然家固  
業商兄弟三人接屋而居食口百人延接賓客讌集無  
虛日君好學工詩及見江淮老宿一時若無錫顧震滄  
華半江宜興儲茗坡松江沈沃田諸君子咸與上下其



緒論然屢躋於場屋隸業國學南遊金陵愛栖霞牛首之勝憑眺山川攷證古今所至傾其坐人歲壬辰應

召試第一授內閣中書乃悉棄產償宿逋攜家北上辛卯成進士授吏部主事癸巳授命與修四庫全書丁酉授翰林編修君遇益隆學益進家益貧然其毫氣真摯發於天性嗜書籍若飢渴待朋友如性命赴人之惠周人之急猶不減其家全盛時也君詩善言情纏綿往復於家世盛衰儕偶聚散娓娓數百言然獨拈鬚俯仰今昔而君亦垂老矣君苦末疾然嘗有山水之思欲遊河洛關陝歸老江寧卜一廛以畢志癸卯秋請假出都由中州歷華嶽抵關中而疾不起今中丞畢公爲經紀其

喪撫其孤南歸護安厝於江寧中丞之篤於友誼爲士林所推而君之夙行信於朋友卽此可知矣君諱晉芳初名廷鑽字魚門內閣中書協辦侍讀事充方略館纂修官吏部驗封司兼文選司主事以翰林編修加四級誥授奉政大夫文淵閣校理充四庫全書纂修官武英殿分校官辛丑科會試同考官生於康熙某年 月

日卒於乾隆四十九年某月

日年若干歲子

二長瀚次某 銘曰

昔賢所闡緒在七閩君籍新安力學維醇疾彼夸博而背其真窮經致用修辭輔仁有粹其實有斐其文博極萬卷不妄本根江水滔滔鍾山嶙峋石窆雲封詞林學

人

皇清誥授朝議大夫戶部河南司主事孔君墓誌銘

君諱繼涵字體生一字補孟號莊谷曲阜人 至聖六

十九世孫祖衍聖恭愨公毓圻父一品廕生傳鉅君以

乾隆庚寅舉於鄉辛卯成進士官戶部河南司主事兼

理軍需局事充日下舊聞纂修官加二級又軍功加一

級 誥授朝議大夫君篤於內行天性過人歲丙戌當

與計吏偕有術者言君此行必獲雋顧母氏恐有意外

虞耳君夙不信術家語聞此則色變不欲行諸父兄弟

趣之行行二百里心怦怦策車而反其在戶部駸駸嚮

用矣一旦以母氏有心疾遽移告歸養三年而母歿又

三年而君歿年四十五君雅志稽古於天文地志經學  
字義算數之書無不博綜官京師七年退食之暇則與  
友朋講析疑義放證同異凡所手校者數千百帙聚集  
漢唐以來金石刻千餘種悉攷覈其事與經義史志相  
比附又以編纂官書得遍觀京城內外寺院古蹟碑記  
歷西山沿昌平岡不稟載君爲人體弱有醞籍生平無  
疾言遽色而精心強力期於致用與人交緩急補助無  
矜色遇藏書家罕傳之本必校勘付鈔以廣其傳所刻  
有五經文字九經字樣算經十書杜預春秋長歷春秋  
土地名趙汭春秋金縷匙宋庠國語補音趙岐孟子注  
休寧戴震文集諸種未刻者君所自撰考工車度記補

林氏考工記解句股粟米法各一卷釋數同度記各一卷其餘題跋雜著名紅欄書屋集者又若干卷詞四卷君生於乾隆四年正月二日卒於四十八年十二月十八日娶孫氏御史紹基女子男五廣祇舉人廣根附學生廣休廣閑廣權孫男五銘曰

雲乎奚以壽君也奚以因其數之倚其經之神其度量鈞其象隸分氣塞岱東蔚乎大文以昌其身以利其子孫

女士方氏墓志銘

邗江之上有高才潔行之士曰兩峰羅聘其室亦女士也曰方氏名婉儀安徽歙縣聯墅村人廣東布政使願

瑛女孫國子學生寶儉女習詩書明禮度兼長於詩畫  
汝揚州人皆能誦其六姑十二首詩其族戚等皆稱道  
其以所生子允紹出繼伯氏事其家人娣姪輩又皆述  
其居常陳說古史名媛孝婦事娓娓可記卽兩峰亦常  
記其忍飢詩白蓮半格詩一時名輩若杭莖蒲丁龍泓  
金冬心皆爲題讚故女士之稱遍徽揚間江山清淑之  
氣不鍾於綺羅豐厚之閨閣而在清寒徹骨畫梅相對  
之貧士家其卒以乾隆己亥五月十九日而其生以雍  
正壬子六月二十四日年四十八故其自壽詩有我與  
荷花同日生之句又自號曰白蓮然兩峰雙瞳如水日  
以畫梅爲生天意假茲女士逗露神致而又不得終與

之俱如此清淚遂可千古是乃梅花之夢耳於白蓮乎  
何與哉生三子長端次允紹三允續女二蓋與兩峰相  
莊者二十有七年其卒也距兩峰北上纔十有三日子  
安忍不銘銘曰

萬卷梅花一卷白蓮其畫也禪其詩也仙吾文冰雪兮  
與此石俱傳

### 李南礪墓表

嗚呼此桂林同知南礪李君之墓北方之樸學嶺南之  
循吏也君諱文藻字素伯號南礪山東益都人乾隆己  
卯舉於鄉庚辰中禮部式辛巳成進士知廣東恩平新  
安潮陽縣事庚寅辛卯二科分校廣東省試同知廣西

桂林府事卒於官君爲吏廉幹所至有聲宦十餘年無一錢攜一拓碑老僕搜巖穴剔榛棘載書數千卷自隨嘗曰官居之貧山水之奇金石文字之富天下未有也君爲學無所不賅齊魯間藏書家自李少卿中麓王司寇池北書庫著錄皆早傳君慨然以衆輯爲已任曰所藏書目曰所見書目曰所聞書目皆詳其序例卷次志其刊鈔歲月其於金石則專以所見爲主蓋君意欲依曝書亭著錄八門之目以編經籍又欲依朱氏經義攷存闕佚未見之例以編金石其在廣西寄予拓本數千百種疾草時遺言寄子編次又百種子雖寡陋必爲攷核論次以成君之志書目則周編修永年志之君年四



十有九有三子章鄧章棉章姚君卒於乾隆四十三年  
八月四日其後四年予始克表其墓以告後之讀大雲  
山房遺書者

皇清誥授奉政大夫刑部主事魚山馮君墓表

乾隆乙酉春予按試廉郡得馮君文奇之遂以選拔貢  
入國學其後歷官翰林刑曹中外士大夫無不知有馮  
魚山者予歷掌文衡所得英雋非一而以天才獨擅屈  
指君爲最先君爲人篤於孝友庚寅秋上海陸耳山典  
粵試耳山夙負知人之鑑及揭榜予與耳山相見於公  
誠所子稱賀曰榜第三馮生者天下異才也亟趣君拜  
見而君適以弟訃悲不自勝至不欲赴會試強之而後

行其官刑曹也乙卯除夕前一日聞父喪痛不欲生子聞亟趨視之大雪後嚴寒已徒跣竟日矣子責其傷生非孝也再四大聲疾呼而後著襪弔者相謂曰此非嚴師不能使著襪也其天性過人皆類此君生平遍遊五岳皆造巔題其匡壁子嘗登岱至絕險處竹筥中見飛流巨石上壁窠鐫馮敏昌來而華山蒼龍嶺高五百丈隆脊徑滑窄不容足行者必援鐵索以上君乃大書蒼龍嶺字於石字徑三尺許旁識歲月又手拓其纏索鐵柱文云崇禎四年三月惜薪司太監府官韓國安施造以拓本寄予其神氣閑暇如此又如匡廬龍門祇柱壺口雷首中條首陽無不遍涉亦探奇罕見者平生詩文

所至有記撰華山小志六卷又撰河南孟縣志又嘗修廣東通志而所爲詩尙待衆輯定之書法由褚入大令尤精研蘭亭諸本與予商訂有出桑俞二考外者其於繪事不學而能鑒別尤不苟蓋以純篤至行而兼衆長藝林殆不數見此人不特廉欽科目自君始也君諱敏昌字伯求號魚山世居欽州祖經邦增廣生父達文歲貢生官訓導君乾隆庚寅舉人戊戌進士改庶吉士授編修刑部河南司主事加二級誥授奉政大夫生於乾隆十二年八月十一日卒於嘉慶十一年二月十一日年六十配潘宜人子三士載士履士鏞孫一紹宗君卒逾年予始得士履所爲狀而表其墓道如右

孝節處士臧君墓表

昔宋楚州徐仲車以孝聞諡曰節孝處士東坡嘗言仲車古之獨行也終日面壁坐不與人接而所周知事極其詳亦異矣今武進處士臧君年三十四而卒其私諡曰孝節父繼宏病瘡二年冬月以身溫被醫往潛起不使父知繼母張氏疾篤刲股以療禱於神請減年以益母而母愈娶婦甫下車撰孝敬辭令女僮誦之俾立聽乃合卺其後偶失母歡輒不與同室約三歲無過乃已君生平不畜童僕躬執薪水之役以承父母歡計其非侍疾則舞笑娛親之日多也然其撰孝子孝女孝婦事至數百卷又三禮校字六卷春秋注疏校正六卷集南

齊臧榮緒晉書二卷刪補吳江嚴氏左傳賈服注三卷  
南宋石經攷二卷拜經堂書目四卷皆尙未刊行以予  
所見者說文解字經攷十三卷子嘗謂宋節孝徐處士  
善讀儀禮而今見君所攷禮今文蓋許祭酒不及見鄭  
氏壘出古今文故未嘗析言而君特表出之又所手輯  
其高祖琳尙書集解案六卷君之兄庸客京師篋書不  
多俟他日求而讀之而先諾其請爲援大略表於石君  
名禮堂和貴其字也

國子監助教辛君墓表

乾隆己酉予於江西選拔貢生得萬載辛君紹業從遊  
南康廣信諸郡歲餘君成進士後官國學者又十年知

其經學最深所與予校勘注疏說文諸條手記皆存予  
篋近來士大夫有持經說相質者必與君共研覈之君  
證據極博而能審擇一是不爲矜異之說今年春見新  
城魯子嗣光尙書解數冊君爲校定之蓋已酉選拔諸  
生惟魯與君治經尤精勤嗣光前十餘年卒予未得表  
其墓孰意今乃表君之墓可傷也已君爲人誠信篤實  
不苟言笑不輕然諾易書詩三傳三禮皆攷辦補訂積  
若干卷尙待鈔梓君乾隆己酉舉人嘉慶丙辰進士國  
子監助教俸滿記名以同知用生於乾隆二十年十一  
月二十七日卒於嘉慶十九年七月十六日年六十娶  
王孺人子四价陶候岫孫三全士連士良士俱庚子舉

人今扶柩歸葬鑄此文於石雖不獲自書丹其學行皆可傳於後者

補錄鄭芷畦窆石志

乾隆四十四年六月十四日孝廉丁君小疋手一紙語方綱曰吾鄉芷畦鄭先輩歿無知之者今於敗麓中得鄭全謝山所爲芷畦窆石志蠹蝕十三四矣謝山集又無刻本吾子倘哀其無傳爲錄此殘作而補綴其事乎方綱按其志曰予少得見芷畦於萬編修九沙坐上其後見蕭山毛西河集盛稱其治經又見秀水朱竹垞爲作石柱記箋序兼知其博物益思見之而芷畦以貧故遊幕府家居之日少其後病風而歸不復出門而予奔

走南北卒不能遂請益之志未幾而芷畦死矣又曰從其族孫振詮求其遺書知其子先亡寡婦弱孫甚可念踰三年始得其禮記集注蓋以續衛正叔之作也四禮參同則纂楊信齋之緒者也湖錄則茗中文獻之職志也又曰中州張清恪雅重芷畦欲薦之而未得又曰芷畦著行水金鑑爲河道傳君開雕顧罕知其出芷畦也芷畦諱元慶湖之歸安人蓋殘藁之可讀者止此於是丁君涕洟洟下曰嗟乎士之顯晦命也吾芷畦之書既不具見矣而其事又不詳是惡足以傳之明日丁君復聚其所錄湖州府志諸條來示曰鄭元慶字子餘府學生軌典籍早歲刻廿一史約編旣以體例未善悔之乃



遊四方以擴其聞見歸益肆力著述會郡守候官陳君屬其修府志乃紬舊聞博稽掌故箋釋顏魯公石柱記刻之又挾鉛槧遍涉七州縣訪其故家文獻駁難辨正無寒暑間志藁出毛西河朱竹垞潘稼堂諸先生皆稱之會陳守罷去後數守欲付梓皆未果芷畦歎曰數十年心力藁凡七易經數賢守垂刻而不就豈湖郡文獻終湮沒耶於是改稱湖錄不名志櫝其藁而藏之晚年託迹幕府研窮經學於易禮尤邃所著有周易集說詩序傳異同禮記集說參同官禮經典參同家禮經典參同喪服古今異同考春玉正月考海通議湖錄石柱記箋釋小谷口蒼菴小谷口其自號也其著書處名魚計

亭云方綱因與丁君共檢諸先生集若毛西河釋二辨  
文援芷畦喪禮經典參同疑士禮喪服記一條又若胡  
東樵萬貢錐指震澤底定句下援芷畦辨湖漣南溥等  
二條西河有湖志序竹垞有贈鄭秀才詩芷畦亦可以  
不朽矣丁君猶以爲未足又考得其年譜大略曰康熙  
二十九年庚午芷畦秋試後出遊四方三十一年壬申  
歸自燕扁戶讀書者二年三十三年甲戌館湖濱徐氏  
撰廿一史約編其明年乙亥始從事於府志四十年辛  
巳秋石柱記箋釋成冬遊孟城明年春遊淮安四十三  
年甲申府志初藁成至其生卒歲月亦未能詳也石柱  
記五卷今已行世又所著今水學兩河薛鏡七省漕程

諸書見行水金鑑中其禮記集說參同八十卷湖錄一百二十卷行水金鑑一百七十五卷而他書卷數亦未詳也方綱按西河客杭在康熙四十一年壬午竹垞贈詩在四十六年丁亥其曰近得茗溪集期君讀草堂謂南宋劉一止集也蓋芷畦考求鄉前哲之著述與一時名輩上下其議論歷年久而用力勤此皆於他集互見中可推證而况其書有補於經學者乎方綱重感丁君之意爲補書於窆志以俟他日訪其書而讀之

祭廬學士文

嗚呼楊園學脈暢於餘山近於先生替其大全須友之堂闡析儒言先生博綜諸家訂刪蓋以校讐貫洽傳箋

兼之訓詁疏壅救偏自官薇省入直禁垣持衡楚粵篋  
笥簡編晉陽暨陽講肄遞傳毗陵金陵著錄日刊大江  
南北通儒後賢胥來就正鍾呂鏗宣泮宮懷舊垂六十  
年白髮經師靈光歸然出處無憾夙夜無愆粹白真醇  
以完其天讀公書者日積攷研炯炯精神公在卷端湖  
山浩氣長雲迴旋鑒此一觴永式几筵尙饗

祭蔣心餘文

嗚呼公之詩文名滿海隅詩兼坡谷詞並辛蘇口誅手  
臆膾炙楷模此皆耳熟不待贊譽今我同年奠醊一盃  
知公之深望雲憎呼惟公神光執道之樞人所說驚公  
獨恬愉人所矜詡公獨若愚其外曠然雲卷風舒其中

淡然玉楹米壺望其貌也山澤之曜卽之粹然溫而益  
腴聽其談鋒諧謔與俱測其中存凜然冲虛惟妙惟微  
觀物之初寸田犁棗義釋耘耨一切聲利空諸有無一  
切名譽逝而不居故其定力湛然自如不爲苟異而能  
不汙室名離垢此之謂乎公之生平庶一追摹滂葩摛  
藻乃其緒餘公馭雲駟神在江湖鑒此來臨無薄生芻  
祭梁冲泉文

嗚呼公之經猷炳在仲冬公之恪勤表著臺端公之清  
節馭歷屏藩此皆中外同聲共歎識與不識涕淚汎瀾  
而我同岑誼切金蘭惻愴之情抑又甚焉追惟同舉今  
四十年惟公伯仲秀峙其間綠野堂陰紫藤花繁一家

詞筆門第蟬聯及公出守海蒞旬宣文章政事終始克  
全伯也養痾嘯咏湖山上念先人臣職惓惓報答之心  
耿耿傾丹後先世緒俯仰迴環皆於我公一身是肩所  
以中夜弗敢懷安晚益清癯廢食與眠前冬六十弗設  
慶筵近課諸兒遠念家園惟有此心不愧青編公今歸  
乎大滌洞天浩浩白雲下照湖船神依乃兄白髮翩然  
追計生平嗜好俱捐有畫一廚有石一卷海圖舊繡往  
日笑言伯惟集杜仲乃集韓江鄉詞話他日必傳以昌  
其身庇其後賢累世之積百世之延我豈私公區區涕  
潛蓋惟公志溘其本源公之精神猶在人寰九霞雲駢  
穆乎來還笑此刻舟猶滯言詮嗚呼哀哉尙饗

祭熊兆堂觀察文

嗚呼公仕畿輔幾三十春湖自守令克綏克勤及陟觀  
察夙夜惟寅凡所經泄遺愛在民而何慘殞賢志未申  
况我同年晨星幾人閏秋下澣驚訃初聞孤兒一號叫  
徹蒼身哽咽之衷慟忍細陳奠此一觴祝告聲吞願公  
精靈炳燭星辰生爲廉吏歿必爲神聰明正直式憑嵩  
君於社於里降帖來臻庇歲之豐致俗之淳不虛父老  
灑淚漳濱願公妥侑詒厥子孫以篤其澤如昌其身必  
於詩禮繼公清芬必於科名報公苦辛簪纓稠疊繩繩  
振振厥嗣興起如公常有粵嶠之西桂水齋淪靈輒南  
去飛旄斜曛山川鬱蒼凝咽寒雲猿吟鶴唳淒結霜晨

他日碑銘敘說遺文桂林叢載志行猶新荔丹蕉黃岫  
曲江瀆誦公平生以感鄉鄰述公節誼以勗忠純不獨  
詞垣側愴措紳文字之緣渺記前塵被髮騎鯨大海無  
垠靈輶來下鑒此椒蘋嗚呼哀哉尙饗

祭朱竹君文

嗚呼先生之文或信或疑此中眞實惟我知之天賦峻  
拔挺骨鬱奇百家之秘神鬼設施其於古文實學昌黎  
醇而後肆滂葩四馳韓之於班厥塗弗歧上接左史渾  
乎無涯鬼瑣貫穿匪葉與枝精液充動匪毛與皮爰逮  
金石遐究鼎彝洪婁是追呂薛是師自昔文家功在修  
辭音訓字詁或罕兼茲而獨先生同源並窺一心兩手



直貫旁推下上千年無往不宜摹仿之極悉去筌蹄考  
證爲文竹垞百詩皆函雅故析入毫厘先生用法參差  
整齊其於古人合而能離欲注班史顏監是期欲旣丁  
韻孫強敢訾吾鄉黃公早已歎咨及見宿儒緒論有資  
髻年兄弟春華並攜吾鄉三朱遠比八慈仲也仙去叔  
季尤怡其於天倫若渴與飢早習韓歌筆利於錐嘔心  
蘊錦赤手鯨騎中年一放大海渺瀰所以其詩更不可  
羈酒酣所草六書必稽吟舫故紙靈風淒淒今所收拾  
太倉一稊老友魚門鉛槧親提不敢辭勞沫流手胝我  
安能役鈔胥是司仰叫蒼穹淚如綆糜終篇所言不暇  
及私一吐奇氣以薦此卮嗚呼哀哉尙饗

壬申同年公祭鄭晴湖文

嗚呼聖湖之瀆毓氣之純曰貌闇闇曰德溫溫館司曹  
司臺垣諫垣偕來痛哭折我松筠矧同榜士耆碩幾人  
三十年事豈忍重陳君來射策由丑遯申吾輩歡集情  
溢杯樽君之謙抑避齒言尊外雖愉怡中實苦辛不見  
圭角道氣渾淪禿且白矣心迹誰論歐陽髣髴子野夢  
魂然當飲酣時復看軒笑談二華電起河奔吁嗟已矣  
衣袂酒痕山陽吹笛帶草盈門煤市街南堂舊清勤相  
國書窻何異家園嗚呼年來譜誼所敦凡有奠筵借我  
弟昆假君門巷肆設牲豚更具茶瓜欸客寒暄依依此  
景逝水潺湲有子傳經球璧瑤琨清陰不改貽慶實繁

日惟哲人不亡者存樹德之滋常庇其根題詩舊蹟湖  
堤古春篆煙一縷黃海夢雲神遊其間上接台辰名悅  
靈輦鑒此蘋蘩尙饗

先像繪成告三代考妣文

維乾隆三十九年歲次甲午冬十二月朔越二十一日  
孫男方綱謹奉告於曾祖考登仕郎禹門府君曾祖妣  
孺人趙太君顯祖考贈奉直大夫孝定府君顯祖妣贈  
宜人高太君顯考贈奉直大夫純庵府君顯妣贈宜人  
張太君之神主曰嗚呼惟我翁氏系出莆田隸籍大典  
於茲九世高祖府君而上真容已隔於播遷壺山六桂  
以來譜序得聞於郵寄蓋先像流傳閩粵實南北之同

源而方綱奉使言旋幸臨墓於合冊一十四幅式靈爽於家祠二百餘年接精神於祖考錫重封而六軸合三代如一堂敬奉几筵用申昭告簪纓世澤常瞻色笑之新瓜聽貽庶益衍綿長之慶尙饗

齊東名宦勒石告祭祖考文

嗚呼惟昔我祖佐邑齊東惠政在民蕃禧貽後召公棠芾歌千里而長新竇氏桂枝屆百年而始茂方綱恭承祖蔭視學此邦蹟稽名宦之祠神式城隍之廟烝嘗弗忒歡趨濟泰武四郊紳士同題大書清廉明三字虔申記述爰勒貞珉慰東人久遠之思叔子長留峴首篤翁氏綿延之慶瀧岡永志歐陽敢告墓門敬焚拓本尙饗

典試順天事竣祭告先祖父母文

嗚呼箕裘堂構荷聖朝錫類之仁科第文章實累世胎  
謀所積蓋苦志遠酬夫祖考而殊榮下逮於孫男茲於  
本年癸卯之秋獲充京兆試官之副凜清白傳家之節  
焚香如對先人念風簷寸晷之艱點筆弗渝初志雖槐  
黃貢舉爲昔今使事所同而梓里掄材乃甲乙科中所  
獨計九秋之榜發合兩月以役旋始得虔告几筵從此  
益申慶報詒康詒穀不徒文字之占宜室宜家彌篤祥  
和之祐尙饗

戊戌八月十三日爲大兒聘朱氏女婚啟

伏惟日下鴛鴦棲托同根之樹雲門膠漆聯從總角之

年喜兒童長大之及時又官職聲名之恰稱方網籤瞻  
鄴架字問雲亭每以文趙收藏未得長箋之共訂而卽  
蘇黃酬唱弗遑阿與之申盟愧芹當乍採之初況月向  
最圓之夕家聲克篤已蘋藻之先占時論同推正門閭  
之相望不獨六書金石外間視若弟兄固宜百歲婚姻  
內訓申於子女敢陳采卜敬佇誨言謹啟

讀四箴敬跋

來吾前者邪正立呈造吾意者良莠暗萌目與構耶抑  
心與營堂戶洞開虛公蕩平 右敬跋視箴

說有邪正音有雅鄭同一善言而有讒佞同一理語而  
有紛競苟非中直何云冰鏡苟非析微何云兼聽不毗

一闕乃克戰勝無聲之先道立持定 右敬跋聽箴

不得已而後言是謂擇言不過乎物以爲言是謂慎言  
眇衆慮而爲言是謂訥言其存其閉其端其原是故君子  
達疊疊焉 右敬跋言箴

正衣冠尊瞻視豈爲人乎實以爲己道如砥直如矢良  
其身乎實良其止行止步趨以中律動容周旋以中禮  
凡百之箴箴心而已 右敬跋動箴 此跋以韻語  
出之便於檢省非敢擬箴也

### 臥遊處箴

訥莽汪戶部家歟之南其山館曰綿潭其可以小憩者  
曰臥遊處屬予箴之其箴曰

宗炳臥遊遊於畫乎匪畫之遊密藏退乎宗炳臥遊遊

以琴乎匪琴之遊集虛心乎是故君子以密安身以虛  
受人寢處山澤而寤寐道真敬尔威儀慎尔笑頰石蘭  
臭味月露精神斯乃遊乎物外而無擇遊乎里黨而可  
親彼無聲之琴與有聲之畫皆於是乎問津

順德府學黎侯銅爵銘

足纔殊廢不同獻之三次在中太守黎敬范銅三百年  
贈者翁繼黎誰歛之洪今古接樓清風

留耕堂銘

耕也有居留也有餘肯堂肯穫以耘以耨其長留者其  
心耕歟是爲硯農學圃大庾楊氏之廬

常熟趙氏祭田碑銘



光和雲安紀產之碑不足以媿其家聲吳中范氏義田之記不足以喻其至情蓋自文毅以來世篤忠貞重以祖孫兄弟積累精誠繼自今光復於前人百倍其經營此所以神靈昭格而天特還之以兕觥也

汪氏雙節堂銘並序

乾隆四十三年春二月二十二日瑞金羅舉人有高持其友人蕭山汪進士輝祖手書來爲其母孺人雙節乞文且曰將勒之石詞甚懇摯方綱合所寄表誌行述讀之若親見節母荼苦狀蓋至是進士父洪縣典史君之歿三十有九年其繼母王孺人歿三年生母徐孺人歿十六年矣宣其言之悲也方綱才蕪弱愧不足闡兩節

母行又懼終無以酬進士屬益怵澀不敢下筆久之海  
鹽張貢生燕昌來京述進士意如羅君言又欲舉筆又  
怵澀且俟蓋兩節母苦志貞心精神貫金石非庸筆所  
可繪畫也其秋羅君歸江西來別方綱曰汪文至今未  
屬藁子何以教我羅曰吾讀注所輯文多矣罕有銘子  
盍銘諸方綱曰諾謹撫其實銘之其詞曰

貞廉吏一典史真慈母雙節氏真孝子汪進士蕭山東  
門大義里視吾銘者可興起

復初齋坐右箴

昔王半山學廢慶弔自我言之學宜併廢遊眺豈但已  
哉學宜併廢談笑夫遊眺實以瑩神卽談笑亦可隨真

然皆適以消磨歲月耗散深醇往者吾友揮石錢兄直  
以遊讌助其吟情竹君朱兄遂以讌談畢其半生念此  
二子實惶實惕嗟我下愚分陰足惜